

禹貢匯疏

禹貢滙疏卷六

吳興茅瑞徵纂并箋

男

亂京亂武

荆及衡陽惟荊州

**傳**北據荆山南及衡山之陽

**疏**其境過衡山

**蘇傳**北條荆山在馮翊懷德縣南南條荆山在南

郡臨沮縣東北自南條荆山至衡山之陽爲荊州

自北條荆山至于河爲豫州 曾氏曰有兩荆山

此荊州之荆山非雍州荆岐旣旅之荆山此荆山

其南爲荊州其北爲豫州漢志此荆山在南郡今

襄陽府臨沮縣衡山在長沙今潭州湘南縣

後漢郡國

志臨沮侯國有荆山荆州記曰西北三十里有清谿谿北卽荆山首曰景山卽卞和抱璞處今南漳縣西北八十里有荆山三面險絕惟西南一徑通人行相傳卞和得玉於上見襄陽府志

爾雅漢南曰荆州李巡註其氣燥剛稟性强梁故

曰荆荆强也 釋名曰荆州取名於荆山荆警也

南蠻數爲寇逆其民有道後服無道先强常警備之也

周禮職方氏正南曰荆州其山鎮曰衡其澤陂曰雲夢其川江漢其浸潁湛其利丹銀齒革其民一

男二女其畜宜鳥獸其穀宜稻

漢地理志楚地

翼軫之分埜也今之南郡江夏零陵桂陽武陵長沙及漢中汝南郡蓋楚分也周成王時封鬻熊之曾孫熊繹於荊蠻爲楚子後寢疆大楚有江漢川澤山林之饒江南地廣或火耕水耨民食魚稻以漁獵山伐爲業果蓏麋蛤食物常足故嵒窳媮生而忘積聚江陵故郢都南通巫巴東有雲夢之饒亦一都會也

江陵記曰楚文王始自丹陽徙都於郢今州北城南是宋忠曰丹陽郡在

枝江縣沈括曰今江陵北十二里有紀南城卽古之郢都也又謂之南郢今郢州謂之北郢路史云

今宜城

杜佑曰楚地分野兼得韓秦之交秦并天

下置郡此爲南郡黔中長沙南陽之東境漢武置

十三州此爲荊州其五溪中地歸漢以後歷代開

拓後漢並因之

後漢郡國志荊州刺史部郡七

南陽南郡江夏零陵桂陽武陵長沙

馬端臨曰漢又爲牂牁郡

之東北境

晉地理志魏武盡得荊州之地分南郡以

北立襄陽郡及敗於赤壁南郡以後屬吳吳後遂

與蜀分荊州於是南郡零陵武陵以西爲蜀江夏

桂陽長沙三郡爲吳南陽襄陽南鄉三郡爲魏而

荊州之名南北雙立 唐地理志山南道古荊州

域江陵

府本南郡

峽歸夔

雲安木東郡

澧朗復郢襄房

房陵郡

為鶉尾分鄧隋泌

即淮安郡治棗陽

均為鶉火分以東道

採訪使治襄州 杜佑曰唐分置山南東道領江

陵

荆

竟陵

復

富水

郢

夷陵

峽

巴東

歸

武陵

朗

澧陽

澧

郡江南西道領長沙

潭

零陵

永

桂陽

郴

江夏

鄂

齊安

黃

漢陽

沔

江華

道

衡陽

衡

巴陵

岳

邵陽

邵

郡

黔中道領黔中

黔

盧溪

辰

盧陽

錦

寧夷

思

清江

施

潭陽

巫

龍標

業

義泉

夷

靈溪

溪

涪川

費

溱溪

秦

播

州播夜郎珍郡兼分入淮南道為安陸安義陽申

郡今嶺南道連山連郡初學記曰荊州之南界屬江南道東界入淮南道

宋為荆湖南北路北路府二江陵德安州十鄂

復鼎即常德府澧峽岳歸辰沅靖軍二荆門漢陽南路

州七潭衡道永邵即寶慶府郴全軍一武岡監一桂陽

而郢州入京西南路黃州入淮南西路興國軍入

江南西路南渡後更定不常其地東界鄂渚西接

溪洞南抵五嶺北連襄漢又兼黔施珍思播五州

入夔州路而廣南東西路亦為荆揚二州域文獻通考

以信陽軍入荊州  
域似入豫州爲是

班固配十二次自張十七度至軫十一度爲鶉尾

於辰在巳楚之分野屬荊州

費直起張十三度  
蔡邕起張十二度

陳卓京房張衡並云翼軫楚荊州 春秋元命苞

曰軫星散爲荊州分爲楚國 春秋緯文耀鉤云

大別以東至九江荊州屬衡星 唐書曰星紀鶉

尾以負南海其神主於衡山熒惑位焉

星經玉

衡第四星主荊州常以五卯日候之乙卯爲南陽

丁卯爲武陵巳卯爲零陵辛卯爲桂陽癸卯爲長



沙

宋天文志三台下星主荊州天市西垣第二

星曰楚五車中央星曰司空主鎮星楚又曰北斗  
第二星曰璇亦分爲楚

張華曰楚後背方城前及衡嶽左則彭蠡右則九  
疑有江漢之流實險阻之國也 武夷熊氏曰荆

州之地亦廣北接雍豫之境南逾五嶺卽越之南  
徼也越雖上古未通已當在要荒之服東抵揚州  
之境西抵梁州及西南夷等處皆楚地也揚州之  
境自兩浙爲吳越之外江淮皆楚境或謂建都於

江南者當以南陽爲正其北接連中原東通吳西  
接巴蜀南控蠻粵故諸葛亮以爲用武之國英雄  
之所必爭凡自北而攻南自南而窺北未有不先  
得此而可以有爲也 劉甲謂荊州爲吳蜀脊高  
保融分江流瀦之以爲北海蓋保江陵之要害

薛氏曰武昌襟帶江沔依阻湖山左控廬淝右連  
襄漢南北二塗有如繩直胡人南牧嘗出此以襲  
豫章 章俊卿曰自武昌而至江陵東通吳會西  
連巴蜀南極湖襄北控關洛人皆知其爲荊湖之

險然以荆湘爲重鎮以襄陽爲唇齒則荆湘之險  
可得而固也又曰沅湘衆水合洞庭而輸之江則  
武昌爲之都會江水下夔峽而抵荆楚則江陵爲  
之都會漢沔之上則襄陽爲之都會守江陵則可  
以開蜀道守襄陽則可以援川陝守武昌九江則  
可以蔽全吳 陳亮曰襄漢控引京洛側睨淮蔡  
包括荆楚襟帶吳蜀沃野千里可耕可守 魏了  
翁曰襄陽據漢水上流與江陵爲唇齒襄陽之唇  
亡則郢復荆門漢陽皆齒也齊安鄂渚爲受兵之

衝長江之險與虜共之矣 權德輿曰黔中爲楚西南微道在漢爲武陵莊躋循江以畧地唐蒙浮船以制越地近荆楚侯如巴蜀五溪襟束蠻蜚聚落陰雨多晦草木少凋者也

〔箋考〕一統志古荊州爲今湖廣省武昌楚始名鄂漢陽

承天德安鄒子國黃州荊州楚郢都岳州古三苗地長沙楚黔

中地寶慶常德衡州荊州南境永州楚南境各府沔陽唐復州

靖柳三州永順保靖二宣慰司其襄陽府爲荊豫

二州域鄭氏曉云襄陽府所屬宜城南漳房三縣及辰州麻考郡志宜城當屬豫州一統志

辰州府古  
蠻夷地

江西省南康九江吉安三府爲荆揚二

州域

章黃云吉安府屬龍泉縣永寧縣屬建昌地袁州府屬萍鄉縣皆是

四川省夔

州府并施州衛平茶司爲荆梁二州域

鄭氏曉云夔州府屬

巫山大昌大寧縣大田軍民千戶所散毛宣慰司所屬是

貴州宣慰司則荆梁

二州之南境鎮遠銅仁二府荆州南裔黎平思南

二府並荆州荒裔也廣西思州府楚黔中地桂林

府亦楚粵之交云 蘇秦說楚威王謂楚地西有

黔中巫郡南有洞庭蒼梧則粵地固應入荆楚矣

唐樞曰湖廣省南滙交廣滇貴諸水於洞庭而

受之於前北引漢沔諸水而固之於後西承川蜀  
諸水而折而過焉東有武昌縣樊山承之而爲大  
回釣臺橫之而爲小回水法縈洄而山奔不歇故  
有不可居終之說蘄黃北倚五關前憑大江占淮  
濡之上腴連雲夢之巨藪古豪傑有取焉然非宅  
中圖外之地其水要不如武昌險要不如襄陽路  
要不如荊州

江漢朝宗于海

〔傳〕二水經此州而入海有似於朝百川以海爲宗

宗尊也

疏周禮大宗伯諸侯見天子之禮春覲

曰朝夏見曰宗鄭云朝猶朝也欲其來之早也以海水大而江漢小以小就大似諸侯歸於天子鄭云江水漢水其流適疾又合爲一共赴海也猶諸侯之同心尊天子而朝事之荆楚之域國有道則後服國無道則先彊故記其水之義以著人臣之禮 朱子曰江漢發源梁州及入海則在揚州至荊州合流迅疾以趨海有似於朝宗 易氏曰江自歸州秭歸至鄂州武昌凡一千四百餘里漢自

均州武當至漢陽軍漢陽縣凡一千四百餘里皆  
荊州之地江漢分流於其間至是合流 王氏炎  
曰漢水入江處在漢陽軍大別山下正屬荊州之  
域

○箋荊州之水以江漢爲主詩曰滔滔江漢南國之  
紀此正記其合流處合則力大勢銳不至海不已  
故以朝宗狀其勢勢一決自不可禦禹治荊州之  
水於江漢得勢九江沱潛雲夢如破竹矣 王氏  
樵曰江水至東陵而北會于漢漢水至大別而南



入于江于荊州記江漢之合不言其合而言其朝  
宗于海一言而盡水勢殆傳水之神也二水在梁  
揚二州自是無可得而書旣言朝宗於海則入海  
不俟言故知三江旣入不指大江也 鄭氏曉曰  
江漢發源于梁而荆當其下流之衝入海于揚而  
荆據其上游之會故于此言朝宗見其上無所壅  
下有所洩

九江孔殷史記作甚中

傳江於此州界分爲九道甚得地勢之中九江潯陽地記

云一日烏白江二曰蚌江三曰烏江四曰嘉靡江  
五日歛江六曰源江七日廩江八曰提江九曰箇  
江張須元緣江圖云九江參差隨水長短或百里  
或五十里始于鄂陵終於江口會于桑落州太康  
地記曰九江劉歆以為  
湖漢九水入彭蠡澤也

**疏**地理志九江在今廬

江潯陽縣南皆東合為大江鄭云殷猶多也九江從山谿所出其孔衆

多言治之難也  
**蔡傳**孔苾殷正也九江水道甚得其正

也蘇云殷當也得水所當行  
朱子嘗考定九江源委一曰瀟

江出道州營道縣九疑山亦名營水過零陵下與湘江合  
二曰湘江出靜江府興安

縣陽山東北名鐸背  
三曰蒸江出衡州衡陽縣西會衡山諸源而下

東北至潭州入洞庭  
四曰資江出武岡軍至益陽西北入洞庭  
五日

持盛故名為蒸  
六曰禹貢

沅江

出沅州西蠻界中至辰州與酉江合

六曰漸江

出索縣東流與沅合

七曰

序江

出辰州淑浦縣廊渠山西流與沅合

八曰辰江

出辰州西南蠻界中東流與酉

合九曰酉江

出會溪城西山中至辰州東合沅辰北流至鼎州東入洞庭

此九

江也

今按蔡傳九水有元水澧水而無瀟蒸與朱小異及考水經止有沅澧湘資酉五水注有

漸水而漸江水直謂之浙江葉夢得謂漸字即漸字桑欽誤分爲二名鄺元注引地理志漸江出丹陽縣南蠻中者是已即今自分水縣出桐廬號歙港者與漸發之溪合而過富陽以入大江

曾氏曰沅漸元辰攸酉湘資醴水皆合洞庭中東

入于江是爲九江導江曰過九江至于東陵今之

巴陵巴陵之上即洞庭也因九水所合遂名九江

羅泌曰十道四番志云江自鄂陵分派爲九於此合流謂之九江口程大昌謂荆境至尋陽以東卽爲揚州山海經云洞庭之山是在九江中而博物志君山爲洞庭山故張勃吳錄云岳之洞庭荆之九江也若尋陽則爲揚境非荆地矣水經注言九江在長沙國下雋縣西北楚地乃今岳之巴陵洞庭在其西北則荆之九江爲洞庭審矣新安陳氏曰江漢朝宗于海卽繼曰九江孔殷導江不曰播九江而曰過九江則大江自大江九江自九

水可見孔氏所謂江於此分爲九道者其非明矣  
證以導江東至于澧過九江至於東陵則九江當  
在澧州之下巴陵之上而不在潯陽與今之江州  
尤明矣朱蔡以洞庭湖當之辨證詳明從之可也  
謂江南凡水皆呼爲江禹時澧州之下巴陵之上  
自有九水今年代久遠陵谷變遷不可以今水證  
古水而闕之亦可也 山海經曰洞庭之山帝之  
二女居之是常游于江淵澧沅之風交瀟湘之淵  
是在九江之間出入必以飄風暴雨 水經曰江

水又東至長沙下雋縣北澧水沅水資水合東流

注之湘水從南來注之

凡此諸水皆注于洞庭之波

又曰湘水

出零陵始安縣陽海山

卽陽朔山

東北過零陵縣東又

東北過鄱縣西又北過醴陵縣西又北至臨湘縣

西又北至下雋縣西又北至巴丘山入于江沅水

出牂柯且蘭縣又東北過臨沅縣南又東至長沙

下雋縣西北入于江

沅水東逕辰陽縣南東合辰水名辰溪口又東逕臨沅縣

南又東入龍陽縣有澧水出關驪以爲興水所出東南注沅亦曰漸水也沅水又東下注洞庭湖方

會于江

資水出零陵都梁縣路山東北過邵陵縣又

東北過益陽縣又東南沅水合於湖中東北入于

江湖卽洞庭酉水東南至沅陵縣入于沅酉水源出益州巴郡臨江

縣故武陵之充縣酉源山東逕酉陽故縣又東逕沅陵縣北又南注沅水酈道元曰

湘灘同源分爲二南爲灘水北則湘川羅君章湘

中記曰湘水之出於陽朔則觴爲之舟至洞庭日

月若出入於其中也湘水又北逕衡山縣衡山東

南二面臨映湘川自長沙至此江湘七百里九

背故漁者歌曰吮隨湘轉望衡九面湘中記曰湘

川清照五六丈下見底石如樗蒲五色鮮明白沙

如霜雪赤崖若朝霞是納瀟湘之石矣湘水又北  
汨水注之又西逕汨羅戍而北對青草湖岳陽  
風土記曰按澧沔沅湘合諸蠻黔南之水滙爲洞  
庭至巴陵與荆江合而東州據其上水經云湘水  
右會小青口資水也世謂之益陽江右則沅水注  
之謂之橫房口東則微湖世謂之麋湖西流注爲  
江謂之麋湖口左則澧水謂之武陵江凡爲五水  
注爲洞庭北會爲大江名曰五瀦戰國策曰秦與  
荆戰大破之襲郢取洞庭五瀦楚辭帝子降兮北



瀟皆其地也

寰宇記云洞庭洞府之庭

趙彥衛曰洞庭有山

水之分吳中太湖內乃洞庭山產柑橘香味勝絕  
楚之洞庭乃大湖連亘數州邊湖亦產柑橘襄陽  
記李叔卒敕子曰龍陽洲有千頭木奴龍陽洲在  
洞庭側也

箋殷字有訓正者堯典以殷仲春是也有訓盛者  
洛誥肇稱殷禮是也孔殷二字終屬費解九江自  
宋胡氏以爲洞庭似無可疑乃註疏並指潯陽而  
以洞庭爲彭蠡誤矣 余嘗秋汎洞庭風日晴美

波澄若鏡倍覺日月開朗今震澤亦號曰洞庭或謂地脉潛接余未敢深信也及考拾遺記云洞庭山浮於水上四時聞金石絲竹之聲故云瀟湘洞庭之樂聽者令人難老其然豈其然乎 王氏樵

曰九江洞庭湖也其源有九水故名九江其後會聚日廣方八百里而洞庭山遂在其中故因山得名而曰洞庭焉所謂荆湖南北路者自是而分導江云東至于澧過九江則是古者澧先入江而後九江入也澧當在九江數外 夏清渠陽考曰九

水四出湖南

瀟湘蒸瀆

五出湖北

沅敘漸辰酉

而沅敘瀆三

水並發源于靖州瀆江出武岡軍唐糾山在今綏

寧縣界改隸于靖卽謂瀆出湖北亦可也 岳州

府志曰昔軒轅遊蜀見水多決之下流江湖皆溢

乃鑿五湖貯水今洞庭一也 大明一統志曰洞

庭湖在岳州府城西南沅漸元辰敘酉澧資湘九

水皆合于此故名九江又九江沅資湘最大皆自

南而入荆江自北而過洞庭瀦其間各爲五瀦每

歲六七月間岷峨雪消水暴漲自荆江逆入洞庭

清流爲之改色青草湖一名巴丘湖北連洞庭南  
接瀟湘東納汨羅之水每夏秋水泛與洞庭爲一  
水涸則此湖先乾青草生焉 湖廣總志曰今辰  
常衡永枝河會流于洞庭者無慮數十水而其會  
衆流而注之湖則有三曰沅江湘江澧江而已沅  
發自牂牁經辰溪合麻陽諸溪洞水過常武出湖  
之北湘發自廣西興安海陽山至分水嶺分爲二  
派一爲灘水一爲湘水至永州合瀟水汨羅過長  
沙出湖之南澧發自武陵古充縣東流過武水口

合焦溪茹溪諸水經慈利石門至澧州出湖之西而漸元辰敘西資共合流而匯爲洞庭以爲之壑  
長沙府志曰湘江分爲二派曰瀰水流而南曰湘水流而北由靈渠與瀰水會湘猶相也言有所合瀰猶離也言達湘南流湘水至永州與瀰水合曰瀰湘至衡陽與蒸水合曰蒸湘至沅州與沅水合曰沅湘會衆流以通洞庭 衡州府志曰湘川東北流過零陵五里與營水合達於衡陽蒸水入焉會流於石鼓之下羅君章所記十五水無瀰蓋

營水在唐名曰瀟耳

考永州府志道州水五而營瀟居其二

沱潛既道

潛一作瀟史記作涔

傳沱江別名潛水名皆復其故道

馬云沱湖也其中泉出而不流

者謂之潛

疏釋水云水自江出為沱漢為潛鄭云今

南郡枝江縣有沱水其尾入江華容有夏水首出

江尾入沔蓋此所謂沱也潛則未聞此解荊州之

沱潛梁州注云二水亦謂自江漢出者地理志在

今蜀郡郫縣江沱及漢中安陽皆有沱水潛水其

尾入江漢耳江源有鄴江首出江南至犍為武陽

又入江豈沱之類與潛蓋漢西出蟠冢東南至巴  
郡江州入江行二千七百六十里此解梁州之沱  
潛也郭璞爾雅音義云沱水至蜀郡都水縣榆山  
與江別而更流又云有水從漢中沔陽縣南流至  
梓潼漢壽入大穴中過峒山下西南潛出一名沔  
水舊俗云卽禹貢潛也此解梁州沱潛與鄭異然  
地理志及鄭皆以荆梁二州各有沱潛孔梁州注  
沱潛發源此州入荊州以二州沱潛爲一  
水從江漢出者皆曰沱潛但地勢西高東下雖於

梁州合流還從荊州分出猶如濟水入河還從河  
出故孔舉大畧爲發源梁州耳 王氏炎曰沱水  
在今江陵府枝江縣土人謂枝江爲百里洲夾江  
沱二水之間其與江分處謂之上沱與江合處謂  
之下沱隋志南郡松滋縣有淦淦卽古潛字故史  
記云沱淦旣耐今松滋分爲潛江縣矣今潛江在縣東一里  
經縣界東南入大江見荊州府志又水經注曰江  
沱枝分東入大江縣治洲上故以枝江爲稱地理  
志曰江沱出西  
南東入江是也

太明一統志曰沱江在當陽縣治南至枝江縣界



入大江 承天府志曰沱水分自大江逕當陽枝  
江交界會于潛禹貢東別爲沱卽此漢水自鍾祥  
北三十里分流爲蘆沱河逕潛江縣東南復入于  
漢爾雅云水自漢出爲潛者是也又遠安縣西南  
九十里紫蓋山上有丹井沱水逕其西 湖廣名  
勝志曰長夏河卽夏水在沔陽州南四十里卽江  
之沱也州西北曰襄河漢之潛也 輿地廣記夏水  
入沔謂之睹口  
冬竭夏流故曰夏水水  
經注睹口爲中夏水是

雲土夢作又

石經倒土夢字太宗時得  
古本始改正見沈括筆談

傳雲夢之澤在江南其中有平土丘水去可爲耕  
作畎畝之治

疏左傳楚子與鄭伯田于江南之

夢地理志南郡華容縣南有雲夢澤杜預云南郡  
枝江縣西有雲夢城江夏安陸縣亦有雲夢或曰  
南郡華容縣東南有巴丘湖江南之夢司馬相如  
子虛賦云雲夢者方八九百里則此澤跨江南北  
每處名存焉左傳稱楚昭王寢于雲中則此澤亦  
得單稱雲單稱夢經之申字在二字間蓋兼上下  
今二澤在雲夢縣南

朱子曰江陵之下連岳州是雲夢

羅泌曰雲夢楚之巨澤也江南爲夢江北爲雲以其跨江相比而謂雲夢爾雅十藪楚有雲夢後世以爲一澤故杜預以雲夢藪爲巴丘湖酈道元謂自江陵東界爲雲夢北爲雲夢之藪誤矣按左氏傳楚子田于江南之夢邛子之女生子文棄之夢中則江南之夢澤楚子涉睢濟江寢于雲中卽江北之雲澤也雲土夢作乂者雲在前爲水所沒至是始得爲土夢在前雖土而未可作至是始可作而乂之葢夢地差高而雲下 洪邁曰漢志有雲

夢官左傳邛夫人棄子文于夢中注云夢澤名在  
江夏安陸縣城東南楚子田江南之夢注云楚之  
雲夢跨江南北楚子濟江入于雲中注入雲澤中  
所謂江南之夢然則雲在江之北夢在其南也職  
方氏以夢爲膏

雲夢跨江南北地故有南夢有北夢五代孫光憲號北夢本此韋昭

曰雲土今爲縣屬江夏南郡華容今地理志江夏有雲杜縣

沈括曰孔安國

注雲夢之澤在江南不然據左傳吳人入郢楚王  
涉睢濟江入于夢中奔郢楚子自郢西走涉睢則  
當出于江南其後涉江入雲中遂奔郢都則今之

安陸州涉江而後至雲入雲然後至郢則雲在江北也江南則今之公安石首等縣江北則長沙監利景陵等縣乃水之所委其地最下江南二浙水出稍高方土而夢已作又矣蘇傳雲與夢二土名也而云雲土夢者古語如此猶曰玄纈縞云爾王孫圉曰楚之所寶有藪曰雲連徒洲金木竹箭之所生也

箋此只言雲夢之水治而土平耳不必分別高下總由江漢二水治相因而致荆之功以江漢朝宗

爲主九江經流沱潛其別流也雲土夢作乂而荆  
州水土無不平治矣

厥土惟塗泥厥田惟下中厥賦上下

傳田第八賦第三人功脩

荆州塗泥與揚同其地稍高故田加一等

楊氏時曰荆江合蜀衆水所委源高而流下自夷  
陵以東地多沮洳陂澤無高山大陵以爲阻固所  
恃以禦水者隄防而已人力一不至則靡潰千里  
豬爲平流不見涯涘昔人有支爲九河以疏瀹之  
者而後水之爲患消荆人利之非一日矣瀕河之

民既習久安乃始盜河爲田而河之故道湮沒無  
復存者。史記貨殖傳云楚越地廣人希飯稻羹  
魚或火耕而水耨果隋羸蛤不待買而足

厥貢羽毛齒革惟金三品杔幹栝栢礪砥砮丹惟箇  
簠楛三邦底貢厥名包匭菁茅厥篚玄纁璣組九江  
納錫大龜

疏揚州先齒革此先羽毛蓋以善者爲先 荀子

曰楚人鮫

鮫魚皮

革犀兕以爲甲韜如金石

蔡傳

職方氏揚州其利金錫荊州其利丹銀齒革所產

不無優劣 魯頌大賂南金鄭氏箋云荆揚之州  
貢金三品 管子曰金起於汝漢 韓子曰荆南  
之地麗水之中生金

傳榦柘也柘葉松身曰枯

疏榦爲弓榦考工記

云弓人取榦之道也以柘爲上陸璣詩疏云柘櫟  
枹漆相似如一則柘似櫟漆也柘枯柘皆木名柘  
木惟用爲弓榦故舉其用也

考爾雅柘松葉柘身  
榦柘葉松身豈枯亦

榆之類與澠水燕談載亳州法相禪院矮檜一郡  
珍玩目其寺曰矮枯似枯檜一也乃洛陽名園記  
云松栢縱杉  
檜栢皆美木



傳祗細於礪皆磨石也砮石中矢鏃

疏祗以細

密爲名礪以麤礪爲稱鄭云礪磨刀刃石也特者

曰祗曾語曰肅慎氏貢楛矢石砮賈逵云砮矢鏃

之石也丹者丹砂王肅云丹可以爲采

今辰錦所出先明砂

并溪洞老鴉井所出尤佳

蘇子瞻石砮記曰禹貢荊州貢礪

祗砮石及簡簾楛梁州貢砮磬至春秋時隼集于

陳庭楛矢貫之石砮長尺有咫問於孔子孔子不

近取之荊梁而遠取之肅慎則荊梁之不貢此久

矣子瞻自儋耳北歸江上得古箭鏃其質石以爲

卽楷矢石磐云

今女直卽肅慎地尚產石磐出黑龍江口名水花石堅利入鐵異物

志云夷州土無銅鐵取磨礪青石以作弓矢此亦石磐楷矢之類

傳箇籥美竹楷中矢榦三物皆出雲夢之澤近澤

三國常致貢之其名天下稱善

楷馬云木名可以爲箭

疏

鄭云箇籥籥風也是兩種竹 竹譜云箇籥二竹

亦皆中矢呂氏春秋云駱越之箇然則南越亦產

不但荆也 顏師古曰楷木堪爲苛今幽以北皆

用之 陸璣疏云楷形似荆而赤莖似著上黨人

織以爲牛管箱器又屈以爲釵故上黨人調曰問

婦人欲買楮不謂竈下自有黃土問買釵不謂山中自有栝  
蘇傳三邦大國次國小國也栝榦栝  
栝礪砥砮丹與箇籥栝皆物之重者荊州去冀最  
遠而江無達河之道難以必致重物故使此州之  
國不以大小但致貢其名數而準其物易以輕資  
致之京師重勞人也

傳甌匱也菁以爲菹茅以縮酒

茅有七  
曰菁茅

疏

周禮醢人有菁菹郊特牲云縮酒用茅明酌也周  
禮甸師云祭祀供蕭茅鄭興云蕭字或爲茜茜讀

爲縮束茅立之祭前酒沃其上酒滲下若神飲之  
故謂之縮或云茅有三脊按史記齊桓公欲封禪  
管仲云古之封禪江淮之間三茅脊以爲藉鄭玄  
以菁茅爲一物菁茅之有毛刺者重之故旣包裹  
而又纏結也

丘光庭曰菁者茅之狀  
貌菁菁然也見兼明書

管子曰江

淮之間有一茅而三脊毋至其本名之曰菁茅

晉語曰楚爲荆蠻置茅蕝設望表蕝謂裹茅而立

之所以縮酒

晉地理志泉溪有香  
茅云古貢之以縮酒

溪蠻叢笑云

麻陽苞茅山茅生三脊孟康曰零茅揚雄曰璚茅

皆三春也爾雅謂之藹廣雅謂之茈萸本草云生

楚地三月採陰乾僇人以社前者爲佳名鴉銜草

今辰常並出麻陽縣有苞茅山在縣東九十里  
見辰州府志又晉書地理志曰零陵縣有香茅

朱子謂古人榨酒不以絛帛而以編茅王室祭祀  
之酒則以菁茅取其至潔也 陸璣疏云詩白茅

包之茅之白者古用包裹禮物以充祭祀縮酒用

魏了翁曰古無灌茅之義所謂縮酒只是醴有

糟故縮於茅以清之若曰滲下去如神飲此鄭臆

說也

靖州見有  
菁茅甚多

傳此州染玄纁色善故貢之璣珠類生於水組綬

類

璣說文云珠不圓也字書云小珠

疏釋器云三染謂之纁李

巡云三染其色已成爲絳纁絳一名也考工記云  
三入爲纁五入爲緇七入爲緇鄭云纁者三入而  
成又再染以黑則爲緇又再染以黑則爲緇玄色  
在緇緇之間其六入者是染玄纁之法也 沈括  
云古人謂幣爲玄纁五兩者一玄一纁爲一兩玄  
赤黑象天之色纁黃赤象地之色故天子六服皆  
玄衣纁裳以朱漬丹秫染之爾雅曰一染謂之纁

練今之茜也色小赤再染謂之窺窺類也三染謂  
之纁蓋黃赤色也玄纁二物也今之用幣以皂帛  
爲玄纁非也 汪氏云冕則上玄而下纁服則玄  
衣而纁裳 呂覽曰人不愛崑山之玉江漢之珠  
而愛已之蒼壁小璣 顏師古曰圓者曰珠不圓  
者曰璣皆蚌之陰精也 桂海蟲魚志曰珠出合  
浦池中有珠池蛋戶投水採蚌取之歲有豐耗多  
得謂之珠熟 杜光庭曰火星之精墜於南海中爲  
大珠徑尺餘時出海上光照數百里  
今名其地爲珠池亦 博物志曰南海外有鮫人  
有珠崖見錄異記

水居如魚不廢緇績其眠能泣珠 玉藻云天子  
佩白玉而玄組綬公侯佩山玄玉而朱組綬大夫  
佩水蒼玉而純組綬世子佩瑜玉而綦組綬士佩  
瑤玖而緼組綬孔子佩象環五寸而綦組綬鄭註  
綬所以貫佩玉相承受者 董巴輿服志曰古者  
君佩玉尊卑有序及秦以采組連結於褳謂之綬  
漢承秦制用而弗改

傳尺二寸曰大龜出於九江水中龜不常用錫命  
而納之 疏史記龜策傳云龜千歲滿尺二寸

杜佑



曰廣濟蔡山出大龜禹貢九江納錫大龜卽此羅  
泌曰大龜納錫故曰蔡并以名其國今考岳州府  
志云出  
巴陵 禮三正記曰天子龜長一尺二寸諸侯

一尺大夫八寸士六寸龜陰故數偶也 干寶曰

千歲龜龜能與人語

述異記云龜千年生毛龜壽  
五十年謂之神龜萬年曰靈

龜

漢書食貨志云龜不盈尺不得爲寶 周禮

龜人掌六龜之屬鄭氏註天龜玄地龜黃東龜青

西龜白南龜赤北龜黑 說苑曰靈龜文五色似

玉似金背陰向陽上隆象天下平法地槃衍象山

四趾轉運應四時文著象二十八宿蛇頭龍脰左

晴象日右晴象月千歲之化下氣上通能知吉凶  
存亡之變寧則信信如也動則著矣 管子曰龜

生于水發之於火

謂卜者以火鑽灼之

於是爲萬物先爲禍

福正 蘇傳寶龜不可常得有則納之若以下錫

上者然不在常貢之例 新安陳氏曰錫貢如敷  
錫之錫上錫下也納錫如師錫之錫下錫上也

王孫圉曰國之寶六而已聖能制議百物以輔相  
國家則寶之玉足以庇廕嘉穀使無水旱之災則  
寶之龜足以憲臧不則寶之珠足以禦火災則寶

之金足以禦兵亂則寶之山林藪澤足以備財用則寶之

箋荆揚貢金並云三品今黃金唯滇中定有貢額頗爲地方之累荆揚貢皆白金然額最廣近日加派日煩楚中兼供黔賦不免襟促肘露而所在開局鑄錢荆爲銅冶所聚頃議專官督鑄尋復報罷至大木上供浮江而下雖間取之川蜀而荆關實綰轂之區尤稱煩累云 荊州自古爲用武之地故制貢於弓矢獨詳枕砮而外箇輅並竹之堅勁

者與楷皆堪爲矢而三邦所出獨勝入貢謹志其地尤必取其有名蓋弧矢之利聖人以威不恪必精且良不欲以濫惡充數致誤戎備也荆俗尚鬼併以菁茅大龜入貢而包匭以示珍納錫以表異皆有慎重意國之大事在祀與戎於荊州制貢備見之禹貢珠璣止見於徐荆二州淮夷蠙珠卽今所謂蚌珠如史所稱隨侯明月之屬皆出江漢乃合浦還珠事見漢史述異記云合浦有珠市今東粵以珠池特聞矣王氏樵曰周衰荆揚之貢

金不入而周王求之于魯春秋譏之漢元帝時貢禹請罷采珠玉金銀鑄錢之官毋復以爲幣租稅祿賜皆以布帛及穀使百姓一意農桑貢禹之言固先王之意也又曰古荆揚有木貢有則貢之棟宇器用有所須則用之甚儉而易共也後代有營繕則工師求大木至于深山窮谷人跡不到之處懸崖弔橋艱難萬倍比至深澗必待夏秋洪水泛漲方抵大江嗚呼林麓盡矣帝省其山則何辭以對是故禹卑宮室而作訓以峻宇彫牆爲戒豈非

人君之所當守哉 丘氏濬曰按魯語肅慎之矢以楷木爲筈以石爲鏃則木亦可爲筈不獨竹石亦可爲鏃不但鐵也

浮于江沱潛漢逾于洛至于南河

**傳** 逾越也河在冀州南東流故越洛而至南河

**蘇傳** 江無達河之道捨舟陸行以達于河故逾于

洛自洛則達河矣河行冀州之南故曰南河 王

氏曰江沱潛漢均與洛不通必陸行逾洛然後由洛可至南河凡曰逾皆水道不通遵陸而後能達

也

箋按是時荊州貢道兼用陸運今楚地若轉輸從陸必經中州境上其漕艘亦從江入淮以達會通河較之維揚止多長江之險耳 鄭氏曉曰荊州至冀州中間還隔豫州貢道近于漢者則徑浮于漢不必沿江而入漢也近于潛者則徑浮于潛而入漢不必自江而入漢也沱自華容縣出于江入于沔沔卽漢也由江入沱由沱入漢一路也潛自漢出至潛江縣入于江由江入潛由潛入漢一路

也 王氏樵曰荊州曰浮于江沱潛漢梁州曰西  
傾因桓是來浮于潛則明有沱潛爲轉輸之道

考荊州分野今爲全楚之區而又別以其州各郡  
雄視南服江漢之間亦一都會也自禹制貢揚荆  
獨繁而二州田土並列下等豈賦固不盡繫于田  
乎然異日者揚荆田土日闢富饒遂甲於天下楚  
地沃野彌望再熟之稻方舟而下吳會並虛口仰  
給而財賦亦最號豐腴頃歲黔蜀震鄰困於供饗  
而又繼以采木分藩徵兵括稅誅求無藝饑饉薦



臻竭澤焚林何以能久荆楚剽悍喜亂其來自古  
天下有事常推楚以爲鋒所望楛矢東來而朝宗  
之誼不廢斯善矣

禹貢滙疏卷七

吳興茅瑞徵纂并箋

男

胤京胤武

全訂

荆河惟豫州

傳西南至荆山北距河水

州界西南至荆山之南即荆州北距河水即冀

州蓋豫在荆之東北冀州之南而以荆河爲界

史記曰昔唐人都河東

殷人都河內周人都河南三河在天下之中若鼎

足王者所更居也 帝王世紀曰禹受封爲夏伯

在豫州外方之南今河南陽翟是也 鄭氏詩箋

云殷有三亳二在梁國一在河洛之間穀亳爲南

毫卽湯都也蒙爲北毫卽景毫是湯所受命也偃

師爲西毫卽盤庚所徙者也詩譜周東都王城

畿內方六百里王城卽洛邑與宗周通封畿東西長而南北短短長相覆爲千里

其封域在禹貢豫州太華外方之間北得河陽漸

冀州之南宣王封母弟友於宗周畿內咸林之地

是爲鄭桓公今京兆鄭縣是其都也其後武公滅虢鄭之地居

之爲漢新鄭縣見地理志李巡爾雅注云河南其氣著密厥

性安舒故曰豫豫舒也釋名曰豫州地在九州

之中京師東都所在常安豫也

周禮職方氏河南曰豫州其由鎮曰華其澤藪曰圃田其川滎雒其浸波澆其利林漆絲枲其民二男三女其畜宜六擾其穀宜五種

黍稷菽麥稻

漢地

理志周地今之河南雒陽穀城平陰偃師鞏緱氏是其分周封微子於宋今之睢陽是也本陶唐氏火正閼伯之虛宋後爲齊楚魏參分魏得其梁陳留魏地盡河東河內南有陳留及汝南之召陵潁彊新汲西華長平潁川之舞陽鄆許偃陵河南之開封中牟陽武酸夷卷皆魏分也韓分晉得南陽

郡及潁川之父城定陵襄城潁陰長社陽翟邾東  
接汝南西接弘農得新安宜陽皆韓分也及詩風  
陳鄭之國與韓同星分焉鄭國今河南之新鄭本  
高辛氏火正祝融之虛也及成皐滎陽潁川之嵩  
高陽城皆鄭分右雒左沛食溱洧焉陳國今淮陽  
地本太昊之虛潁川南陽木夏禹之國宛西通武  
關東受江淮一都之會也杜佑曰荊河州在天  
官柳七星張則周分野房心則宋之分野觜觿參  
則魏之分野角亢氐則韓之分野兼得秦楚之交

秦分天下置郡爲三川礪潁川南陽郡之東北境

南郡之北境漢武置十三州此爲荊河州

後漢

郡國志豫州刺史部郡國六潁川汝南梁國沛國

陳國魯國而弘農河南二郡爲司隸校尉部

東漢都洛

陽置司隸校尉又別置豫州于譙郡

馬端臨曰漢時爲郡國八郡

曰潁川河南陳留汝南沛南陽國曰梁淮陽又爲

漢中

北境

弘農郡

東境

唐地理志河南道古豫

州域洛陝負河而北爲實沈分負河而南號汝許及新鄭之地爲鶉火分鄭汴陳蔡潁爲壽星分宋

毫爲大火分東都河南

府即洛州

汝以都畿採訪使治

都城內餘以河南採訪使治汴州

杜佑曰唐分

置十五部此爲都畿河南府

洛

陝郡

陝

臨汝

汝

榮

陽

鄭

郡河南道爲陳留

汴

睢陽

宋

濟陰

曹

譙郡

毫

潁川

許

淮陽

陳

汝陰

潁

汝南

荆

郡兼分入山南東

道爲淮安

唐

南陽

鄧

襄陽

襄

漢東

隨

武當

均

郡河

東道爲弘農

號

郡

初學記曰

襄州禹

貢刑

豫二州之界

宋

東京汴

之開封也西京河南府大中祥符七年建應天府

即歸德軍

爲南京慶曆二年建大名府爲北京先是改

開封府爲京畿路崇寧四年又于京畿四面置四  
輔郡潁昌府爲南輔鄭州爲西輔澶州爲北輔建  
拱州於開封襄邑縣爲東輔並屬京畿其後沿革  
不一開封府屬京畿路應天興仁即曹州二府拱州

本襄邑縣廣濟軍漢定陶縣屬京東西路襄陽府鄧隨均唐

四州光化軍屬京西南路河南潁昌即許州淮寧即陳州

州順昌即潁州四府鄭孟蔡汝四州信陽軍屬京西

北路亳州屬淮南東路馬端臨曰宋豫州之境

俱爲京師輔郡置京東路府則開封應天州則曹



單拱軍則廣濟京西路府則河南襄陽州則汝鄭

許鄧均陳穎蔡唐隋軍則棗陽光化兼得陝西路

之陝虢淮東路之亳州

考單州地爲單父碭山魚臺成武應屬徐州

班固配十二次自氏五度至尾九度爲大火於辰

在卯宋之分野屬豫州

費直起氏十一度蔡邕起氏八度

自柳九

度至張十六度爲鶉火於辰在午周之分野屬三

河

費直起柳五度蔡邕起柳三度

陳卓京房張衡並云房心宋

豫州柳七星張周三輔春秋元命苞曰鉤鈴星

別爲豫州春秋緯文耀鉤云外方熊耳以至泗

水陪尾豫州屬搖星

星經玉衡第七星主豫州

常以五午日候之甲午爲潁州壬午爲梁國丙午爲汝南戊午爲沛國庚午爲魯國

問周公定豫州爲天地之中東西南北各五千里今北邊無極而南方交趾際海道里長短夏殊何以云各五千里朱子曰此但以中國地段四方相去言之未說極邊與際海處周公以土圭測天地之中則豫州爲中而南北東西際天各遠許多至於北遠而南近則地形有偏耳所謂地不滿東南

也 武夷熊氏曰豫州居天下之中四方道里適均故古人於此定都不但形勢之所在亦朝會貢賦之便湯之亳今河南偃師縣是也成王之洛邑今河南洛陽縣是也其地北距河南抵荆山東抵徐西抵雍梁今爲河南府號郊鄭汝陳蔡唐鄧汴宋等州之地 晁氏曰昔夏后初都陽城南踰洛陽百里而遠成湯遷亳東踰洛陽五十里而近皆舍洛陽而不都周興武王旣定鼎郊鄆厥後召公相宅洛邑周公營成周其意盛矣而成王卒不果

遷逮宣王中興自濟之洛狩于圃師及於敖山  
以朝諸侯車攻之詩作焉豈不欲成周召之志歟  
然宣王卒亦不果至平王遷而周衰矣 陳子昂  
曰渥澗之中天地交會北有太行之險南有宛葉  
之饒東壓江淮食湖海之利西馳崤澠據關河之  
寶 劉寬夫曰大梁當天下之要總舟車之繁控  
河朔之咽喉通淮湖之運漕 唐末博士朱朴獻  
遷都議曰古之帝王不常厥居皆觀天地興衰隨  
時制事關中周隋所都我實因之凡三百歲文物

資貨奢侈僭僞皆極焉廣明巨盜陷覆京闕高祖  
太宗之制蕩然矣夫襄鄧之西夷漫數百里其東  
則漢興鳳林爲之闕南則菊潭環屈而流屬於漢  
西有上洛重山之險北有白崖聯絡誠形勝之地  
沃衍之墟若廣浚河渠漕輓天下可使大集自古  
中興之君去已衰之衰就未王而王今南陽光武  
雖起而未王也臣視山河壯麗處多故都已盛而  
衰難可興已江南土薄水淺人心驚浮輕巧不可  
以都河北固水深土厚而人心彊復狼戾未卽可

服襄鄧旣爲內地人心質良去秦咫尺而有上洛  
爲侵軼之限此建都之極選也疏奏在廷無是其  
說者 章俊卿曰酈食其苟文若之徒皆稱陳留  
爲天下之衝四通五達之郊秦漢以還訖南北朝  
天下有變常爲戰場王霸之興未有都于汴者自  
隋煬帝大開汴河直達淮泗而大梁實坐要會振  
南北水陸之衝形勢百倍李唐屹爲重鎮宋朝混  
一因都大梁大抵長安以陝西爲畿輔而屏蔽實  
在隴右洛陽以關東爲畿輔而屏蔽實在河東大

梁以河南爲畿輔而屏蔽實在河北秦觀曰長  
安左轂函右隴蜀襟屏終南太華之山縈帶涇渭  
洪河之水地方數千里皆膏腴沃野卒有急百萬  
之衆可具形勢便利下兵於諸侯如建瓴水四塞  
之國也故其地利守自古號爲天府開封地平四  
出諸道輻輳南與楚境西與韓境北與趙境東與  
齊境無名山大川之限而汴蔡諸水參貫巾車錯  
轂軸輻銜尾四通五達之郊也故其地利戰自古  
號爲戰場洛陽左瀍右澗表裏山河扼轂颺之隘

阻成臯之險直伊闕之固廣袤六百里四面受敵  
以守則不如雍以戰則不如梁然雍得之可以爲  
重自古號爲天下之咽喉凡天下形勢無過此三  
者也彼蜀之成都吳之建業皆霸據一方之具而  
楚之彭城特盜賊之窟耳 呂祖謙曰關中是形  
勢之地洛是都會之中欲據形勢須都關中欲施  
政令須都洛 范仲淹曰西洛帝王之宅表裏山  
河接應東京連屬關陝而河陽據大川之險當河  
東之會要爲西洛之北門又曰洛陽險固而汴爲



四戰之地太平宜居汴卽有事必居洛陽 李綱  
曰今未能趨關中莫若適襄鄧鄧者古之南陽光  
武之所興也西隣關陝可以召兵北近京畿可以  
遣援南通巴蜀可取貨財東達江淮可運穀粟  
趙鼎言經營中原當自關中始經營關中當自蜀  
始欲幸蜀當自襄陽始 胡氏曰襄陽上流門戶  
北通汝洛西帶秦蜀南遮湖廣東瞰吳越欲退守  
江左則襄陽不如建業欲進圖中原則建業不如  
襄陽欲禦疆寇則建業襄陽乃左右臂也

〔箋〕河患兗爲甚豫次之故二州疆域並繫以河

國家河防亦唯山東河南爲最急 考一統志古

豫州爲今河南省河南

魏司州

南陽

秦取韓地置郡

汝寧三

府其開封

魏都大梁晉陳留國

歸德

古商丘漢睢陽

二府則兗豫二

州域湖廣襄陽府則荆豫二州域 鄭氏曉曰今

河南開封府所屬祥符陳留杞通許太康尉氏洧

川鄆陵扶溝中牟蘭陽及六州所屬湖廣襄陽府

所屬均州鄖縣上津竹山光化棗陽穀城山東曹

州西南地及定陶縣似當屬豫

考河南歸德府寧陵夏邑柘城商丘

並應屬豫州湖廣德安府隨州併屬豫州襄陽府  
志稱穀城屬荆宜城屬豫章潢云直隸東明當亦  
屬豫文獻通考竹山  
屬房州轄應入梁州 曹學佺曰河南者大河以

南也衛輝彰德懷慶三府實兼河北而有之 丘

氏濬曰三代以前洛爲中國之中以今天下概之

則南北袤而東西蹙其所謂中蓋在荆襄之間朱

子曰天旋地轉閩浙反爲天地之中閩浙在東南

海盡處難以爲中朱子蓋以聲名文物通論天下

非論地勢也 魏太常校曰長安洛陽大發於周

而其機啓自神禹龍門鑿而涇澧漆沮會于渭汭

入河長安始可都矣伊闕鑿而伊與澗瀍會於洛  
汭入河洛陽始可都矣

伊洛瀍澗既入于河

傳伊出陸渾山

熊耳山在陸渾縣西

洛出上洛山

豸嶺山在上洛縣境

內澗出沔池山瀍出河南北山

沔池在新安縣西穀城潛亭北此即

是河南境內之北山也

疏地理志云伊水出弘農盧氏縣

東熊耳山東北入洛洛水出弘農上洛縣豸嶺山

東北至鞏縣入河瀍水出河南穀城縣潛亭北東

南入洛澗水出弘農新安縣東南入洛伊瀍澗二

水入洛合流而入河 水經曰洛水出京兆上洛

縣謹舉山又東會于龍餘之水又東逕熊耳山北

東北過盧氏縣南又東北過宜陽縣南又東過洛

陽縣南伊水從西來注之又東過偃師縣南又東

北過鞏縣東又北入于河又曰伊水出南陽縣西

蔓渠山又東北過伊闕中又東北至洛陽縣南北

入于洛澠水出河南穀城縣北山

縣北有潛亭澠水出其北梓澤

中東與千金渠合

穀水自千金塢東注謂之千金渠

又東過洛陽

縣南又東過偃師縣又東入于洛澠水出新安縣

南白石山東南入於洛 山海經曰謹舉之山洛

水出焉陽虛之山臨于玄扈之水是爲洛汭也杜預

註雒汭在河南鞏縣南水曲流爲汭 魏畧曰漢火行忌水故去其

水而加佳魏爲土德土水之母也水得土而流土

得水而柔除佳加水 水經注曰世人謂伊水爲

鸞水北入伊闕昔大禹疏以通水西山相對望之

若闕伊水歷其間北流故謂之伊闕矣陸機云洛

有四闕斯其一焉隋煬帝觀伊闕曰得非龍門耶遂議都詔楊素營之其宮室北

據却山南直伊闕以洛水貫都有天漢之象遂造天津橋以架水用大纜維舟鐵鎖鈎連之詳河南

名勝志

蔡襄導伊水記曰伊水出伊陽縣西齊山

北流至闕塞折東會于洛自闕塞治渠醴水行  
十八里以貫郡城伊瀕大山屬連數百里其生植  
多材木林竹薪蒸橡栗之饒歲取之設方泝以載  
浮伊而下循渠引竹萃于城中人用賴焉 山海

經曰婁涿山又西四十里曰白石之山澗水出于  
其陰西北流注于穀水水經曰穀水出弘農黽池  
縣南嶓冢林穀陽谷東北過穀城縣北又東過河  
南縣北東南入于洛孔安國曰澗水出澠池山者

也今考洛河在河南府城南三里源出陝西洛南縣冢嶺山至鞏縣北十里入黃河伊河在府城南源出盧氏縣閼嶺流經嵩縣洛陽界會于洛  
渰河在府城東出穀城山南流入于洛澗河在府城西其源有二一出澠池縣白石山一出盧氏縣香爐山俱流至洛陽縣會于洛見河南通志

宋河渠志李仲建言西京鞏縣河縣汜水河陰縣界乃沿黃河地分北有太行南有廣武二山自古河流兩山之間乃緣禹跡昨自導洛清汴於黃河沙灘上節次創置廣雄武等堤埽在京城之上患且不測今如棄去諸埽開展河道講究興復元豐二年以前防河事不惟省歲費寬民力河流且無



壅溢之患都提舉汴河堤岸賈種民言元豐改汴口爲洛口名汴河爲清汴者凡以取水於洛也復置清水以備淺濫元祐間却於黃河撥口分引渾水今自澧上流入洛口比之清洛難以調節乞依元豐已脩狹河身丈尺深淺簡計物力以復清汴立限脩濬通放洛水從之 李格非曰伊洛二水自東南分注河南城中而伊水尤清徹

箋按豫州雖距河却已自兗入海此外水惟伊洛瀍澗而洛爲最大故禹治豫水先于此自此而東

滎波自此而又東則蒍澤孟渚而已 四水以洛  
爲主澗瀍先入洛此先言伊者以水之大小爲先  
後導水言東北會于澗瀍又東入于伊則以相入  
之先後言耳。書所載有入于海者若三江旣入  
江漢朝宗是也有入于河者伊洛瀍澗是也入于  
海則徑趨于海入于河則因河以至于海也 王  
氏樵曰豫之洛猶雍之渭而書法不同涇澧漆沮  
雖皆入渭而水之大小不同故曰屬曰從曰同各  
別志之伊洛瀍澗四水相敵故統志其入河與江

漢同文又曰北水以河爲宗豫水以洛爲宗王  
綱振曰濟洛二水同豫州入河共爲豫患濟大而  
洛小乃洛爲一州之專害濟則數州之公患其雷  
夏澤大野豬濟水之治已散見於兗徐諸州惟洛  
出入皆在豫此所以與雍州之渭同一發例以經  
四州之河濟終後於一州之洛亦賓主之辨也  
曹學佺曰三川河洛伊也其形若鼎

滎波旣豬

滎波今文  
作滎播

疏汎水入河而溢爲滎滎是澤名洪水之時動成

波浪此時波水已壅遏而爲豬畜水成澤不濫溢也鄭云今塞爲平地滎陽民猶謂其處爲滎澤在其縣東春秋衛侯及狄人戰于滎澤杜預云當在河北 索隱曰滎澤之口與今汴河口通其水深可以灌大梁 水經曰河水東過滎陽縣蕩蕩渠出焉注大禹塞滎澤開之以通淮泗卽經所謂蕩蕩渠也漢明帝議治汴渠乃引樂浪人王景作堤發卒數十萬起自滎陽東至千乘海口千有餘里景乃商度地勢鑿山開澗防遏衝要疏決壅積十

里一水閘更相洄注無復潰漏之患渠流東注淩

儀復謂之淩儀渠

蔡傳云漢志謂滎陽縣有狼蕩渠首受濟南曰狼蕩北曰淩儀

其實一也元和郡縣志汴渠在河陰縣南亦名狼蕩渠隋更名通濟渠

爾雅云水

自洛出爲波

水經曰洛水又東門水出焉注云爾雅所謂洛別爲波也

山海

經曰瞻諸山西三十里婁涿之山陂水出于其陰

而北流注于穀水郭璞注陂水世謂之百荅水

水經注曰應劭所謂孤山波水所出也馬融廣成

頌曰浸以波滢其水又南逕蠻城下又南分三州

於白亭東而俱南入泄水泄水自下兼波水之通

稱也故闕駟有東北至定陵入汝之文

馬端臨曰汝水出歇

馬嶺卽應劭所謂孤山在今臨汝郡魯山縣西北

水經濟水又東合榮

瀆注云瀆水受河水有石門謂之榮口石門蓋故

榮播所道自此始 曾鞏曰禹於榮澤下分大河

爲陰溝出之淮泗至浚儀西北復分二渠其後或

曰鴻溝或曰浪宕渠或曰浚儀渠或曰石門渠漢

靈帝時於敖城西北累石爲門以遏渠口者是也

石門渠東合濟水與河渠東注至敖山之北而兼

汴水又東至榮陽之北而旃然之水東流入汴榮

陽之西有廣武二城汴水自二城間東流而出濟水至此乃絕隋大業初皇甫誼發河南丁夫百萬開之起滎澤入淮千有餘里更名曰通濟渠唐開元中裴耀卿言江南租船自淮西北泝鴻溝轉相輸納於河陰含嘉太原等倉凡三年運米七百萬石 陳亮曰禹於滎澤之下嘗引河流以注東南而通淮泗蓋其肢脉猶未盛也自秦決浚儀以灌大梁而并天下而河汴始分流矣漢承齊秦之後而受河之患爲尤劇及永平閒河流旣塞始築汴

渠而又脩浚儀渠其後隋大業中大開通濟之渠而河汴達于淮泗者始安流而無碍是以東南轉輸相繼而上本朝都陳留而宿重兵以爲固其資東南之粟者不知其幾千萬石故置發運使以漕之而浚渠之功爲不細矣故本朝受河之患無以異于漢而受汴渠之利則自漢以來未之有也考索云宋定都于汴是時漕運分爲四路東南之粟自淮入汴至京師若是陝西之粟便自三門白波轉黃河入汴至京師若是陳蔡一路粟自惠民



河至京師京西之粟自廣濟河至京師四路最重  
惟是汴河宋朝所謂歲漕六百萬石專倚辦江淮  
箋榮波二水一濟一洛叅雜言之亦變例也 王  
綱振曰洛入河則記波豬宜也而兼識濟出之榮  
者以濟亦豫州入河而後溢爲榮故蒙洛入河之  
文見榮能受濟之溢波能安洛之流耳

導荷澤被孟豬

左傳爾雅皆作孟諸宋藪澤也周禮作盟諸漢書作盟豬史記作明都

傳荷澤在胡陵孟豬澤名在荷東北水流溢覆被  
之 疏地理志荷澤在濟陰定陶縣東孟豬在梁

國睢陽縣東北 括地志云菏澤在曹州濟陰縣

東北九十里定陶縣東今名龍池亦名九卿陂

考曹

州東南三十里有菏水亦名菏澤濟水會此入海今涸見山東通志又兗州府志云菏水在定陶縣

北二十里 玉海曰濟陰縣南有菏山故名其澤爲菏

澤今東平濟南淄川北海界中有水流入于海謂

之清河實菏澤 水經曰濟水東流者過乘氏縣

又東過金鄉縣南又東過方與縣北爲菏水菏水

又東過湖陵縣南東入于泗水 闕駟十三州記

曰不言入而言被者明不常入也水盛方乃覆被

矣 金氏曰荷澤在今曹州沛陰縣孟豬在今應天府虞城縣自荷澤至孟豬凡百四十里二水舊相通今荷澤自分南北清河近時大河亦被孟豬併行睢水矣 宋史河渠志廣濟河導荷水自開封歷陳留曹濟鄆其廣五丈歲漕上供米六十二萬石

〔箋〕兗豫接壤榮與荷澤皆以志濟也導洸水溢爲榮又東至于荷可與此處叅看 榮波在豫西北荷孟在豫東北澤與豬不同豬是蓄而復流澤是

水之聚 此處却逗出一導字下文導山導水皆從此導字發脉要見禹治水全以疏導爲事耳

王氏樵曰按孟豬之藪可田則有水草而淺涸時多故導荷澤之溢時乎被孟豬不常入也或言導荷澤又導孟豬故言及非也澤無言導者此二澤相通故可以導此之溢被彼之地故言導也

厥土惟壤下土墳壚

傳高者壤下者墳壚

壚說文黑剛土也

釋名曰土黑曰

盧盧然解散也 王氏炎曰壤則沃墳壚則爲瘠

呂覽曰凡耕之道必始於壚爲其寡澤而后枯  
箋豫土止言壤其色雜也從厥土中又別以下土  
言之與青州再指海濱同義 王氏樵曰周禮草  
人掌土化之法凡糞種墳壤用麋渴澤用鹿土化  
之法謂化之使美若汜勝之術也糞種鄭注謂煮  
取汁今人不知其法按博物志麋聚草澤而食其  
場成泥名曰麋暖民隨之種稻其收百倍此卽今  
人糞田法也草人土化之法有用麋用鹿恐亦是  
之類也墳壤潤解也渴澤故水處也卽此經所云

墳壚也

厥田惟中上厥賦錯上中

傳田第四賦第二又雜出第一 臨川吳氏曰冀賦第一或時數少於豫則降爲第二而升豫爲上上豫賦第二或時數多於冀則升爲第一而降冀爲上中也

箋大畧豫州田賦與冀州相乘除爲上下其雜出之等高于正額故先言錯

厥貢漆枲絺紵厥篚織纊錫貢磬錯

周禮職方氏豫州其利漆臬又周官載師漆林之  
征二十有五周以爲征而此則貢者蓋周時豫州  
在畿內故載師掌其征而不以制貢禹時豫在畿  
外故有貢推此則知冀州不言貢之意矣

今考河南上產

漆出南召浙川葛出信陽及光山固始見通志

陸機曰紵亦麻也科生

數十莖宿根在地中至春自生不歲種也荆揚之

間一歲三收今南越紵布皆川此麻

草木蟲魚疏

杜

預曰吳地貴縞鄭地貴紵

傳續細綿

疏續是新綿織是細

孔鮒曰續綿

也絮之細者曰纈 顏師古曰漬繭擘之精者爲  
綿麤者爲絮今則謂新者爲綿故者爲絮古亦謂  
綿爲纈或作紕

傳治玉石曰錯

疏詩云佗山之石可以攻玉又

曰可以爲錯磬有以玉爲之者故云治玉石曰錯  
謂治磬錯也 臨川吳氏曰凡錫者非常貢故於  
末特言之龜非貢物故言納不言貢橘柚磬錯雖  
是貢物非常制所貢也故言錫貢

箋豫州職貢亦畧與兗相似蓋二州皆近冀冀京



師旬服也專供粟米充豫二州近京師則專供服  
御禹制貢先服食而後器用以及珍幣則次第派  
及它州耳 唐國史補稱襄州人善爲漆器天下  
取法襄州近豫州域 青貢絲枲徐貢玄纈縞楊  
貢織貝荆貢玄纁皆所謂布縷之征也惟不及雍  
梁二州 錫貢如今常額之外臨期加派若納錫  
則不入貢額有則聽其自行交納一從民便不責  
所無以厲民也

浮于洛達于河

箋豫州之水以洛爲宗滙衆流以入河而卽資之  
以爲運道轉漕帝都最爲直捷此在豫西境者也  
若東境徑自入河不必言矣 丘氏濬曰帝堯都  
平陽商都亳成王營洛邑皆以河爲運道達于河  
卽達于京師也後世都汴洛者皆由汴水入河都  
長安者雖不濱河然亦由河入于渭是古今建都  
無有不資于河道者 大明一統志曰汴河舊自  
滎陽縣東注開封府城內又東合蔡河名葭菰渠  
又名通濟渠東注泗州下入于淮累因河決其蔡

河湮沒無跡而汴河自府西中牟縣入黃河矣  
考豫州今爲河南之域中州接壤畿輔四通五達  
實號與區洛陽固自古建都地物華土產名在海  
內而賦額去上中較遠至紆續之貢亦不必盡如  
古抑語云觀河洛而思禹功乃禹貢志導洛頗畧  
而功與河並豈虛哉